

Wo i herkomm

Katherina Braschel

do, wo i herkomm, do wiad ma no griaßd
auf da stroßn
außa
du bisd de neiche vom pfenninger
dea si jo grad erst
hod scheidn lossn

bei uns, do muasd ned erst frogn,
da oida oda da junge Pfenninger,
weil des waaß ma jo,
und außadem,
dass de Maria imma scho a bissl a Komische woa
und dass´ rechd vü furt gongan ah is,
sogoa ohne earm,
wonn´a kegln woa mid da Feieawehr,
jednfois sogd ma hoid a´so

do, wo i herkomm, kennans mi in dem klaan Spar,
dea Freisinger haaßd,
weil de des Gschäfd imma scho hom,
ah heid nu, wonn i eini geh
oba de Frog is,
wia long´s eam nu gebn wird,
weil da junge Freisinger
onscheinend ned übanehman wü
obwoi´a imma so brav Ferial gmochd hod
beim Papa,
scho seid´a a Bua woa
und da Frau Anna, de ah scho imma durt oabeit,

werd´as woi kaum gebn,
weil woher soid sie si des leistn kenna,
bei ihrm Gehoit
wonn da Freisinger zuasperrd
komma bei uns goa nimma z´Fuaß eikaufn geh,
donn wern de Kartoffimercedes ins Kellawinkal gstöhd,
und derfn nua mehr im Summa am Bodese
an´d frische Lufd

do, wo i herkumm, gibds zwoa auf da Stroßn
kaane Boakplätz mit Schüda
oda Strichal am Bodn
oba trotzdem waaß a jeda genau
wo´ra parkn derf
und wo ned, weil sunsd da Fronz
mid seim Auto nimma aus da Garrasch kummd
oda de Evelyn ihre Mistkübln ned außa stöhn ko
und so waaß ah a jeda
wonn wer an Bsuach hod
und kann ah bissal schaun,
wer des leichd is
des is jo ah praktisch

do, wo i herkumm,
konns da passiern,
dass de Mama di schimpfd,
weilsd z´spaad aus da Schui zum Essn kummsd,
dawei hod anfoch da Busfoahra de Tia ned aufgmochd,
weil aane vur da Endstation,
hod nur mehr zöhd,
wia dringend ea aufs Heisl hod miassn

Ondasrum konns da ah passiern,
dass´d im Winta in da Fruah bei da Hoitestöh stehsd,
füa de´s nu imma kaan Untastond gibd
und goa nix kummd,
weils gschniebn hod
und de Stroßn nu ned graamd is
obwoi ma desöwe Postleitzoi
wia in da Stoodt drin hom
Wobei des jetz eh ka Thema mehr is,
weil wirklich gschniebn hods scho long nimma

do, wo i herkomm, woas friara ondas,
do woitn de Leid, de do ned gwoohnd hom,
earnare Kinda auf Bsuach ned allanig auf da Stroßn spün lossn,
de erst Onfong von de Neinzga betoniert woan is
und wo i bis auf´d Nohd ummagrennd bin.
Do hod da Auwirt Charlie vurn on da Stroßn nu
Cafe Bauchstich ghoaßn,
wo heid de Leid auf da neichn Terrassn Kaffee drinkn
und den Kuachn von da Oma Charlie essn,
nochm Spaziergeh im Naherholungsgebiet
oda wonn sie si a Haus zum Kaufn do ongschaud hom.
In dem Naherholungsgebiet
gibts jetz Nordic-Walking-Streckn
an Volleyboi-Bloods
und Gackerl-Sackerl,
de imma nochgefüüd wern
und de Leid kumman extra her,
damids im Bodesee hintn, wo da O-Bus aufheard,
schwimman geh kennan,
nur mir grausd,

weil i waaß, dass do friara
de Mülldeponie woa
und wia i a Kind woa
oft amoi de Fiisch midm Bauch noch obn
drin gschwumman san

do, wo i herkomm,
homma friara ausm Küchnfensta an scheen Ausblick ghobd,
auf a oide Eichn,
de in da Erdn von dem Auto-Schrottbloods
bsundas guad gwoxn is
und wo ma de Kotzn beim Vasteck spüün
hod zuaschaun kenna
üwa olle Raafn und Stoßstongen und hinige Autos drüwa
owa irgndwonn
homs de Autos wegzaahd
und de Eichn o´grissn
und jetz
stehd a Mehrparteinhaus do,
wo de Wohnung so vü kost wia domois mein Opa
unsa gonza Grund und des Haus dazua,
owa do hod ah nu gleich hintam Haus
de Au ongfongd
und den Auto-Schrottbloods hods ah nu ned gebn

Wonn i heid Leid sog, wo i herkomm,
donn frogns noch, wo genau.
Ob obn bei da Kirchn, wo imma scho de gödign Bauan gwohnd hom
und da Kirtog is
oda hervurn bei de oidn Hochheisa midn Sperrmüll vor da Tia
oda durtn, wo friara desöbn und jetz ondare Hochheisa stengan.
Und wonn i donn sog: durtn, aane vua da Endstation, beim ersten See, donn songs:

mah. Schee.

Friara hod des ghaaßn: oh.

Grod, dass ned gsgd hom: des duad ma Laad fia di, dass du so oane bisd.

Owa des mid dem Griaßn

und des mid de Boakbläds

und des,

wos ma hoid so sogd,

und wos ma hoid so waaß,

üban Pfenninger

oda da Evelyn ihre Mistkübin

des woa imma scho so,

durt, wo i herkomm.

Wei voa sowos

is ma in da Voastodt nia sicha,

ah, wonns a soichane is.